

L'AVIGNÎ DEMOGRAFIC DE REGJON. CUALCHI CONSIDERAZION

Dilunc di une cunvigne di pôc timp indaûr tignude a Udin, si à displeât a un public regionâl il teme de dinamiche demografiche dal Friûl Vignesie Julie tal prossim avignî. Daûr di chest interes, la motivazion plui 'fuarte' e jere chê di «studiâ i cambiaments demografics, sociâi, economics e tecnologjics, par guviernâju cence fâsi cjapâ di sorprese».

La materie no je tra chês che pal solit a tirin la atenzion, ancje se lis resons par fâ previsioni demografichis a son tantis, e l'interès viers di chestis al va di là de sole ricercje, stant che a puedin jessi aplicâts ancje tes situazions praticjis. A puedin judâ, par esempi, i policy makers stant che a dan un supuart par planificâ i investimenti dal avignî, par stimâ jentradis e jessudis, par tornâ a definî lis direzions programaticjis e par regolâ la azion politiche amministrative tal lunc tiermin.

Lis previsioni demografichis. Se il strument al è pal sigûr impuartant, altri discors e je la affidabilitât di une prevision e, di consequence, la logjiche che le à creade.

Lis previsioni demografichis no pretindin di dâ la 'veretât', ma a puedin judânus a sielzi lis ipotesis plui credibilis, a accettânt altris savint che a puedin jessi relativementri pôc probabilis, a eliminâ cun sigurece chês che a son pardabon impossibilis. Tes previsioni demografichis, duncje, i margjins di incertece a son avonde limitâts. Cheste carateristiche, che altris previsioni – par esempi chês dal timp o chês economi-

chis – no àn o a àn di mancul, e conserve la sô validitât ancje par periodis di plui agns. Di fat, se o cjapìn in considerazion, intun determinât moment, une popolazion, o podin 'lei' te sô strutture, e a voltis in maniere une vore precise, cetancj elements de sô storie. Par esempi la presince di pôcs fruts sul totâl de popolazion nus dîs che tal passât resint la feconditât e je stade basse; un grant numar di anzians nus lasse pensâ che l'insiemi demografic tal so complès al ve di une speranza alte di vite.

Il fat che la strutture di une popolazion e sedi il risultât di tendincis dal passât nus da ancje cetantis informazions su la sô evoluzion pal avignî. Cheste proprietât e je infuortide ancje dal fat che lis carateristiche demografichis des popolazions, in particolâr di chês dai paîs plui disvilupâts, a cambiin dome in maniere graduâl, o ben a àn une fuarte 'inerzie'. Ve ca cualchi esempi par sclarî ce che o vin pene dit. Une declarazion vonde comune come a dî «il 99% di chei che vuê a àn 20 agns al sarâ in mò vîf tra 10 agns» e sta sul fat che tal nestri paîs la mortalitât tes fassis plui zovinis o adultis e je une vore basse e che duncje la



ALESSI FORNASIN

Alessi Fornasin, nassût a Palmatal 1962, laureât in Storie te Universitât di Triest al è ricercjadôr di Demografie te Universitât dal Friûl. Al insegne la stesse materie tes Universitâts di Udin e Triest. Al è autôr di cetancj lavôrs sedi di Storie economiche che di Demografie cuntun riferiment particolâr al Friûl. Al è atualmentri President de Societât Taliane di Demografie Storiche.


selezione naturâl de muart e je dongje dal zero. La affermazion «8 personis su 10 tra chei che vuê a àn 90 agns no rivarà a 100» e poie invéci su la considerazion che la selezione in etât avanzade e je vuê, ancje se di mancûl rispjet al passât, une vore fuarte. La logjiche des previsionis demografichis si fonde propit sui resonaments come chescj, disvilupâts però in maniere sistematiche.

Tal frontâ il teme dai disvilups pussibii tal avignî di une popolazion si pues fâ une distinzion, in gjenerâl, tra proiezioni e previsionis. Chestis a doprin la stesse metodologjie ma, intant che lis previsionis a son dome un esercizi computazionâl, dulà che, su la fonde di caracteristichis de popolazion sot studi, pal solit imponudis come imutabilis, si proietin tal avignî i risultâts di calcui plui o mancûl complicâts, tes previsionis il ricercjadôr al inserìs cualchi ipotesi su cemût che al podarà jessi l'andament demografic tal futûr.

In Italie il produtôr principâl di previsionis demografichis al è l'Istat. Lis previsionis Istat a son fatis sedi a nivel nazionâl che cun specificichis regionâls.

I risultâts a son presentâts daûr diferents senaris, un cussì clamât 'centrâl', che al varès di rapresentâ la evoluzion de popolazion considerade plui probabile, un senari 'bas' e un 'alt' che a cjapin in considerazion diviers modei evolutîfs di feconditât, mortalitât e migratorietât che a puartin a popolazions minôrs e maiôrs de ipotesi 'centrâl'.

Lis previsionis regionâls. Lis previsionis regionâls Istat plui resintis a son in relacion al periodi 2011-2065 e a àn come



01. Piramide des etâts. Residents talians e forescj. Friûl Vignesie Julie al 1 di Zenâr dal 2015. (Font: <http://demo.istat.it>).

popolazion di fonde i residents, talians e forescj, al 1 di Zenâr dal 2011. Un dai ponts plui critics al è chel de siele de popolazion di fonde che e corispuint al ultin dât anagrafic prime dal censiment. Cheste siele e condizone par fuarce di robis, e in negatîf, i esits de prevision. Si sa in letature che i dâts anagrafics a àn la tendince a soestimâ la popolazion residente pal ingrumâsi di erôrs te dificultât a fâ corispuindi a ogni cambiament di dimore abituâl il trasferiment di residence. Ancje il confront cu lis informazions dal 15m Censiment de popolazion, lis miôrs par valutâ la popolazion dal Friûl Vignesie Julie tes sôs diviersis articolazions territoriâls, al met in lûs cemût che il dât anagrafic, di 9 mês prime, chel dal 1 di Zenâr dal stes an, al sedi une vore plui alt di chel reâl.

Nol è pussibil sclarî la difERENCE tra anagrafe e censiment, dut cês plui e je grande

la distance temporâl che e passe de rilevazion dal censiment, plui alte e je la distorsion anagrafiche. Tal cês des ultimis previsionis Istat, cheste e je massime. La ultime prevision buride fûr dal Istitut nazionâl di statistiche e je la base documentarie dulà che si fondin dutis lis ricostruzions tal avignî de popolazion des regjons talianis. Vuê, daspò 4 agns che a son stadis fatis, si pues verificâ se a son buinis doprant i dâts anagrafics ma ancje, e soredut, capî cemût che la popolazion dal Friûl Vignesie Julie e sta cambiant.

Par chel che al rivuarde la nestre regjon, al 1 di Zenâr dal 2015, rispjet ae popolazion rilevade, la popolazion previodude e je plui grande in ducj i trê senaris pressapôc dal 2% (119.563 residents 'vêrs' rispjet ai 123.688 'previodûts' tal senari centrâl), une percentuâl avonde piçule, ma che tradusude in cifris assolutis e je di cirche 24.000 unitâts, no tant distant de popolazion di Monfalcon (28.122), il cuint comun de regjon par numar di abitanti. La difERENCE plui grande si riferìs ae popolazion foreste

(107.559 e 129.338), cuntune sorestime di su par jù il 20%.

Daûr dai dâts anagrafics, i fo rescj vuê in Friûl Vignesie Julie a son mancûl dal 9% dal totâl, cuant che invecit tai trê senaris di prevision a superin il 10%. Daûr dai numars assolûts il senari di prevision che si svicine di plui al dât anagrafic al è chel 'bas'. In particolâr, la difference sui citadins talians e je plui basse di 1.000 unitâts.

Il pont di partence di cheste discussion e je la struture par etât de popolazion dal Friûl Vignesie Julie al 1 di Zenâr dal 2015, cussì come che e ven fûr dai dâts di origjin anagrafiche publicâts di pôc dal Istat (figure 1).

La piramide des etâts e ten cont dal insiemi de popolazion residente cu la distinzion tra citadins fo rescj, la part interne, e citadins talians.

I elements che si notin a son une grande distribuzion par etât che e mostre doi ingruessiments tes etâts dongje dai 50 agns, par vie dai baby boomers, o ben a lis gjenerazions nassudis tra la fin dai agns '50 e '60. Tes parts superiôr e inferiôr la popolazion e diminuîs une vore. Tal prin câs chest al è dât di un numar plui piçul des classis plui vielis e, naturalmentri, ae cressinte influence de mortalitât; tal secont al diminuî de feconditât daspò dal baby boom. Dentre de piramide gjenerâl si viôt chê, di forme diferente, de popolazion foreste, une vore numerose tes classis di etât 0-9 e 25-49. L'element che al fâs la difference tra cheste piramide des etâts di chê di un passât resint e je, di là dal naturâl spostament viers l'alt di prominencis e scanaladuris, la evidente riduzion des fassis di etât plui bassis che si son



02

02. Palaç Istat, Rome.

regjistradis tai ultins agns. Chest fenomen, za anticipât tai studis di popolazion, nol è dât dome des variazions de feconditât plui resintis, che a son minimis, ma des tantis jessudis de etât fertile des feminis des gjenerazions dai agns '60 e '70, e de jentrade te stesse etât des feminis des classis plui zovinis, che a son tantis di mancûl. Il risultât di chest procès al à puartât a une composizion de popolazion regionâl che no si pensave dome pôcs decenis indaûr.

Al baste pensâ che vuê lis personis che a àn 80 agns a son di plui dai fruts che a àn mancûl di 1 an. Se po o cjapìn in considerazion dome lis feminis cun citadinance taliane, lis frutis nassudis tal 2014 a son di mancûl des lôr nonis bis che, tal stes periodi, a àn fat 88 agns.

Tai agns daspò ae base di prevision, la difference tra la popo-

lazion 'vere' e chê previodude e varie di cirche l'1,8% fint al 2,3%. Se cheste difference e fosse dome tal numar absolût di abitants al sarès avonde facil tornâ a calibrâ i dâts di prevision puartantju tes lôr dimensions justis midiant une piçule corezion. Cemût che o viodarìn, però, lis robis no son propit cussì. Tra un an e chel altri, la distance tra i dâts di prevision e i dâts anagrafics no mostre tantis diferencis. Chescj però a fasin regjistrâ une piçule flession dal numar dai residents tra il 2014 e il 2015. No je une robe gnove. Ancje la serie storiche Istat, dulà che si stime la popolazion residente dal Friûl Vignesie Julie tal interval intercensuari 2001-2011, e met in lûs cualchi piçule diminuzion dal numar di abitants tra un an e chel altri te seconde metât dal deceni. La flession tra il 2014 e il 2015 però, si viôt sul dât anagrafic 'reâl' che, o ricuardi, al ten an dopo an a so restimâ la popolazion. La cause principâl de diminuzion de popolazion regionâl al è il

sbassament dal numar di forescj. Stant ai dâts Istat, tal 2015 pe prime volte il dât dai residents forescj, ancje se di pôc, al è plui bas di chel dal an prime (107.559 al 1 di Zenâr 2015 cuintri 107.917 al 1 di Zenâr dal 2014). Chest amancul a partî dal 2002, o ben di cuant che a son disponibii i dâts anagrafics intercensuaris 'corets'. Ancje a nivel nazionâl si viôt un ralentament de cressite dai residents forescj, ma propit pe inversion di segn la situazion in Friûl e somee une vore impuartante.

Al è inmò masse adore par dî se cheste flession de popolazion complessive, e cetant contignude, e sedi un dât coniunturâl o se, invezzi, e sedi un vêr pont di svolte. Disîn dut câs che e sta dentri intun cuadri di stabilitât sostanzial intal lunc periodi dal numar di abitants de regjon. Cualchi element che al ven fûr dal confront a son il numar dai nassûts inmò sot des aspetativis e un numar plui alt di anzians.

Dut câs, l'aspîet che mi somee plui rilevant al è il numar plui bas des previsionis dai zovins di etât 20-29. Plui di 5.000 zovins che a mancjin al apel, e no son dome forescj. Cheste e je une part di popolazion particolarmentri impuartante sedi tal presint che in prospettive future. Si trate, di fat, di zovins che a son prossims a jentrâ o che a son a pene jentrâts tal mont dal lavôr, e che a stan par tacâ o che a àn za tacade la lôr vite productive. La ipotesis interpretative di chest fenomen e je che al podedi jessi l'efiet su la popolazion residente de mobilitât dai students e de emigrazion viers i paîs forescj di zovins talians cun alte scolarizazion. Al è clâr che, par capî se



03. La longjevitât dai nonos, che a son simpri di plui rispîet ai plui piçui.

lis robis a son propit cussì, bisugnarès infondî i studis.

I residents forescj. Cemût che o vin viodût, lis previsionis a son miôr cun riferiment ai residents cun citadinance taliane impen dai residents forescj. Propit la dinamiche dai residents forescj e rapresente un aspîet une vore impuartant in merit ai disvilups de popolazion tal prossim avignî, e al è culî che a àn di concentrâsi i sfuarçs par cirî di lei cun plui clarece i cambiaments demografics in at. Si sa che, di fat, lis cuistions relativis ai flus in jentrade e in jessude de popolazion a son une vore dificii di previodi.

Lis puestis in jentrade e in jessude de popolazion foreste sot lis diferentis vôs a àn cuasi simpri un salt positif. I nassûts a son tancj di plui dai muarts (rispetivementri 1.647 e 175 tal 2014) par vie che la popolazion

foreste e à une struture zovine. I iscrîts tal forest a son plui di chei cancelâts (4.434 e 1.650), ancje se il dât reâl al è plui bas di chel di prevision. I iscrîts e i cancelâts da e par altris comuns talians, ancje se si belancin avonde (6.025 e 5.566), a dimostrin che il Friûl Vignesie Julie al à inmò une buine capacitât di atrazion pai imigrâts. Par chel che al rivuarde la vôs 'altris iscrîts' e 'altris cancelâts' a son operations di retifiche anagrafiche. Ancje chestis vôs, fin al 2013, a puartin simpri a un salt positif, a part chel dal 2014 (1.663 iscrîts e 2.703 cancelâts).

Lis acuisizions di citadinance. La ultime vôs di considerâ e reste chê des acuisizions di citadinance. Dal pont di viste dal balanç anagrafic si trate di une pueste in jessude che no à cuintripartide par vie che la vôs in jentrade e varès di rivuardâ la popolazion di citadinance taliane. Al va notât che lis acuisizions di citadinance a

àn vût simpri plui impuartance dilunc dai ultins agns. A jerin sot des 2.000 unitâts fint tal 2011, ma a son plui che dopleadis tai 3 agns dopo. Chest dât al è une vore impuartant sedi par fâ interpretazions che par fâ previsionis. Di fat la difference cussì impuartante tra residents forescj tal dât anagrafic e in chel di stime al è di dâ in misure cressinte ae dinamiche des acuisizions di citadinance. Simpri plui dispès, duncje, i 'talians', e duncje i 'furlans' e i 'julians' a son 'ex forescj'.

Conclusions. Daspò di vê presentât chescj dâts, o podìn duncje tentâ di fâ une prime

sintesi: cuâl avignî, duncje, pe popolazion regionâl? Daûr des previsionis demografichis Istat e, in particolâr, leintlis ae lûs des deviazions dal percors de dinamiche demografiche reâl, lis criticitâts che si cognossin a son di tornâ a viodi in negatîf. Prin di dut la permanence de feconditât a nivei une vore bas e compuartarà une altre diminuzion dal pês des classis di etât plui zovinis, e duncje simpri plui un invieliment demografic. Il declin dal numar dai nassûts, di fat, al è inmò ai iniziis, e al larà indevant inmò par agns. Daspò si viôt une riduzion dai flus migratoris, e chest al è pal sigûr efiet de situazion economiche gjenerâl e e teste-

monee une atrative plui basse dal Friûl vuê rispiet a cualchi an indaûr. In fin, la diminuzion no previodude des classis di etâts impuartantis di chei di vincj agns e mostre inmò di plui un impuariment demografic de regjon ancje tal prossim avignî. Daûr dal capitâl uman 'pierdût', po, si varan ancje di valutâ lis consecuencis sul sisteme economic.

La situazion duncje no je tant buine. Però, stant che la plui part dai cambiaments demografics intal periodi curt al poie su la dinamiche migratorie, sedi in jentrade che in jessude, il quadri culî delineât al podarà jessi mancûl scûr tal prossim avignî di ce che al somee.



PERAULIS

Anagrafe. Regjstri de popolazion residente tignût dal Comun rivuard ai fenomens di stât (consistence) e di moviment (iscrizions des nassitis e des imigrazions, e cancelazions par muart e par emigrazion).

Censiment. Rilevazion totâl de popolazion in un dât moment realizade da un organism statistic uficial (in Italie l'Istat).

Previsions. Calcul de configurazion de popolazion in un an futur su la fonde des tendincis passadis e di ipotesis atentamenti valutadis sui possibii senaris che a podaran verificarsi cun nivei alts di probabilitât.

Proiezioni. Stime de consistence de popolazion su la fonde de aplicazion a la consistence iniziâl, ripartide par classis d'etât, dai parametris registrâts tai ultins agns.



PAR SAVÈNT DI PLUI

Istat (2015), *Rapporto annuale 2015. La situazione del paese*, Roma.

Livi Bacci M. (1999), *Introduzione alla demografia*, Loescher, Torino.

Pellizzari G. (2015), *Come saremo tra 15 anni, il futuro ai raggi X*, in «Messaggero Veneto», 5 luglio 2015, p. 16.

Terra Abrami V. (1998), *Le previsioni demografiche*, Il Mulino, Bologna.

Sitografie

<http://demo.istat.it/>